



Albertushof vegn buca vendius

Sonda vargada ei stau sigl **Albertushof**, gl'antierur bein claustral dallas soras **dominicanas** da Glion, ina fiera da plugls. Fetg bia gliued ei stada l'emprema gada sin quei plaz agl ur dalla via da Ruschein. Gl'antierur menaschi puril ei denton buca venals.



La casa dil mi-
giur digl **Alber-
tushof**, a Glion.

FOTO AUGUSTIN BEELI

Ei hagi fatg senn d'organisar la fiera da plugls sigl areal digl **Albertushof**, ha **Sandra Koch**, responsabla per la communicaziun dalla claustra da Glion, declarau sin damonda dalla FMR. Sonda vargada ha bia gliued priu la caschun da visitar quell'occurrenza. Ins ha saviu entrar ella stalla veglia dil menaschi e circular sper ils differents stans da rauba. Enqualin dils visitaders ei sedumandaus daco che la claustra organiseschi leu ina fiera da plugls. Fagend allusiun agl inserat ch'ei cumpariu el Fegl uffical dalla Surselva cuagl invit alla fiera da plugls ei la curella sederasada che las soras **dominicanas** veglien vender gl'**Albertushof**. Avon ch'ina casa cun con-

tuorn vegn venala, ston ins svidar ella.

En cass digl **Albertushof** ei quei denton in'otra raschun. Sandra Koch refusa che las soras seigien vidlunder da svidar la casa dil miur e che quella vegni vendida. «Na, quei constat insumma buc. Igl ei tut auter. Nus havein semplamein s'encurschiu ch'igl **Albertushof** ei fetg adattaus sco liug per ina fiera da plugls», declara Sandra Koch. Era ina claustra stoppi far uorden periodicamein e sedistaccar da rauba. Els biars loghens nua che las soras erien activas seigien numerusas causas serimnadas. Per quei hagian ins decidiu d'organisar per l'emprema gada ina fiera da plugls sin ed entuorn gl'areal digl

Albertushof.

Las habitaziuns seigien affittadas ed ei detti negins indecis per ina midada da proprietad, ha la responsabla dalla communicaziun dalla claustra accentuau. Ella ha confirmau ch'ei seigi stau ina fetg buna e biala fiera da plugl cun bia gliued, ins pondereschi da cuntinuar cun quell'occurrenza sin quei areal. Fetg biars visitaders cuntents han cumprau quei e tschei battegl. Il gudogn ei destinaus per in'ovra caritativa. «Gl'entir recav va a favur dils fugitivs, buca mo quels dall'Ucraina, mobein a tut quels ch'ein silla fuigia».

AUGUSTIN BEELI/FMR